

# Angua Venená

Kon lo bo sinti si bo tabata enfermo i un dòkter ta dreña bo kamber di hòspital ku inteshon pa pasábo un angua venená? “Esei no por sosodé na nos isla”, bo ta bisa. No por?

Asosiashon médiko di Hulanda a aprobá eutanasia na 1984 i a introdusí guianan pa eutanasia pa protehá e pashènt kontra e dòkter. Ma no tabata te 1993 ku Hulanda a bira e promé pais na mundu pa legalis’é. Dia 9 di febrüari, Kámara di Diputadonan a aseptá un lei ku ta duna médikonan libertat pa yuda un pashènt kometé suisidio. Senado a aprobá esaki ku un voto di 37 voto na favor i 34 kontra dia 30 di novèmber di e mésun aña.

Gobènantenan tan preokupá pa e mancha mahos ku esaki por laga riba reputashon di Hulanda a emetí un komunikado pa splika nan posishon. Ofisialmente eutanasia lo keda ilegal—un delito den e kódigo penal pa kual por haña 12 aña di prison. Bunita! Ma e médiko ku ta sigui sierto guia ofisial ora nan ta mata e pashènt lo por spera di keda “inmün di ser persigüí” (ku tradusí na un forma komprendíbel ta nifiká legalisashon)!

Kiko ta e guianan ofisial? E pashènt mester tin su sano huisio, e mester ta sufriendo di doló insoportabel ku no por ta aliviá, e mester pidi pa eutanasia rípitídamente, e dòkter mester konsultá ku un otro médiko independiente promé ku e por yuda e pashènt tèrminá su bida, i e mester skirbi un rapòrt detayando kon el a kita e bida. Ma hopi dòkter no ta hasi kaso di e guianan!

Echu ta Hulanda simplemente a legalisá loke el a tolerá pa 20 aña kaba. Ta kalkulá ku kada aña médikonan hulandes a yuda 3000 pashènt ku a pidi pa muri.

Ma e biahe riba e kamina mortal no a finalisá. Un enkuesta di gobièrnu hulandes a haña ku dòkternan a “yuda” 3600 hende muri na aña 1995. Ma e sífra ei ta inkluí solamente esnan ku a **pidi** pa muri. E enkuesta NO a inkluí e **900 kaso ku dòkternan a tèrminá bida di e pashènt SIN nan petishon**. Tampoko e enkuesta a inkluí e **1900 kaso ku médikonan a oumentá remédi di e pashènt ku inteshon di pura nan morto**.

Paga bon tino! Hulanda ta riba un kaminda mortal spantoso! Promé nan a tolerá eutanasia BOLUNTARIO...e pashènt mes ta deseá pa tèrminá su bida. Ma awor Hulanda ta aseptá eutanasia INBOLUNTARIO...e pashènt NO ta disidí pa pone fin na su bida. Otro hende (e dòkter, famianan, èts.) ta disidí p’e!

Un señora ku kanser inkurabel tabatin miedu di bai hòspital, sabiendo ku dokternan sa pone fin na bida di e pashènt. Dòkter Ben Zylicz a sigur’é ku e lo sòru p’é. Sigurá, e dama a bai hòspital, i a haña morfina pa kita su doló. Ma ora Zylicz a bai, un otro médiko a dreña su kamber, preskribí mas morfina, i den poko minüt e señora tabata morto. Ora Zylicz a demandá un splikashon su kolega a bis’é, “Mi tabatin mester di e kama.”

Famianan di un otro dama a reuní na Amsterdam pa su morto planiá. Un famia a bin di un otro pais. Anto e pashènt a disidí pa no aseptá eutanasia. Ma e famianan a argumentá, “Bo no por lag’é (e famia) bin di tan leu pornada.” Kontrario di deseo di e pashènt, dòkter tòg a pas’é e angua.

Proponentenan di eutanasia ta argumentá ku loke nan ta hasi ta miserikòrdioso, ta spar sèn, ta aliviá doló, èts. Ma nos Kreadó a bisa “*no mata*” (Eksodo 20:13) ningun ser humano, ni asta esnan ku ta seriamente deformá “*pasobra segun e imagen di Dios El a traha hende*” (Génesis 9:6).

No kere ku eutanasia na otro banda di laman nunca por yega aki. Hopi médiko na nos islanan ta hulandes òf a studia na Hulanda. I enfermeranan ta haña lès serka proponentenan di eutanasia. No pensa ku niun di nan ta kontaminá pa e mentalidat burdugu! Segun nos ta komprendé, ya kaba eutanasia tin su pia den nos porta! Si nos no ta dal e porta sera purá, dia por yega ku un dòkter ku angua venená por para banda di BO kama!